

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

1. प्रधानमंत्री नरेन्द्र मोदी होर अज्ज जम्मू रेलवे डिवीजन दा वर्चुअल ढंग्गै राहें उद्घाटन करडन। केन्द्री मंत्री डॉक्टर जितेन्द्र सिंह होरें इसी इक परानी जरूरत करार दित्ता ऐ।
2. रेलवे सुरक्षा कमिशनर होर कल 7 ते 8 जनवरी गी उधमपुर—श्रीनगर—बारामुला रेलवे परियोजना तैहत कटरा—रियासी सैक्शन दा वैधानिक निरीक्षण ते आजमैश करडन।
3. केन्द्र सरकारै किश्तवाड़ जिले दे मुलवाड़वन ग्रां च अगग लग्गने दी घटना करी प्रभावित परोआरें आस्तै बशेश राहत सहायता मंजूर कीती ऐ।
4. एलजी मनोज सिन्हा ते मुखमंत्री ओमर अब्दुल्ला होरें लोकें गी श्री गुरु गोबिंद सिंह जी हुंदे प्रकाश पर्व दे मौके पर मुबारकबाद दित्ती ऐ।
5. काजीगुंड च भारी बर्फबारी करी जम्मू—श्रीनगर राश्ट्री जरनैली सिड़क, गडिडएं दी आओजाई लेई दौनें बक्खी दा बंद ऐ।

<><><><><><>

PM-Railway

प्रधानमंत्री नरेन्द्र मोदी होर अज्ज वीडियो कांफ्रेंसिंग राएं जम्मू रेलवे डिवीजन दा उद्घाटन करगंन ते बक्ख—बक्ख रेल परियोजनाएं दा नीह पत्थर रक्खगंन। नमां जम्मू रेलवे डिवीजन भारत दे दमर उत्तर कोने च रेल सेवाएं दे सुचारू ते कुशल प्रबंधन लेई इक बड्डी गैह साबत होग। लगभग 742 किलोमीटर लम्मे जम्मू रेलवे डिवीजन च 5 सेक्शनां होंगन। इस बेल्लै भारत च कुल 17 रेलवे जोनें च 68 रेल मंडल न। जम्मू 69मां रेल मंडल बनी जाग। जम्मू रेलवे डिवीजन दे बनने कन्नै रोजगार, ढांचागत विकास, सैलसफा दा प्रचार प्रसार ते समाजिक आर्थिक विकास होग। अज्ज दे उद्घाटन समारोह दरान उपराज्यपाल मनोज सिन्हा ते मुखमंत्री उमर अब्दुल्ला होर बी मजूद रौहगन।

<><><><><><>

MoS Jatinder Rail(byte)

केन्द्रमंत्री डॉ. जितेन्द्र सिंह होरें प्रधानमंत्री आस्सेआ जम्मू रेलवे डिवीजन दा अज्ज उद्घाटन कीते जाने दा सुआगत कीता ऐ ते गलाया ऐ जे जम्मू रेल मंडल इस इलाके दी इक बड़र परानी जरूरत ही। उनें आखेआ जे पिछले किश ब'रे दरान फिरोजपुर डिवीजन दे तैह्त जम्मू कश्मीर दे रेल नेटवर्क दा बड़ा मता फैलाव होआ ऐ ते नमें रेल डिवीजन दे बनने कन्नै जम्मू कश्मीर च रेल मंत्रालय लेई प्रशासनिक ते तकनीकी क्षमता बधेग। डॉ. सिंह होरें रेलवे डिवीजन दे रूपै च जम्मू सूबे गी इक नायाब तोहफा देने लेई प्रधानमंत्री नरेन्द्र मोदी हुंदा धन्नबाद कीता।

<><><><><><>

Railway Inspection

रेलवे सुरक्षा कमिशनर होर कल 7 ते 8 जनवरी गी उधमपुर—श्रीनगर—बारामुला रेलवे परियोजना तैह्त तकरीबन 17 किलोमीटर लम्मी कटरा—रियासी सैक्शन दा वैधानिक निरीक्षण ते आजमैश करडन। इस सैक्शन च पूरी चाल्ली तारें पर खड़ोते दा अंजी खड़ड आह्ला रेलवे पुल ते चिनाब दरेया च दुनिया दा सब्बनें शा उच्चा रेलवे पुल बी शामिल न। इस परियोजना दा सब्बनें शा चुनौतिपूर्ण हिस्सा टी31 सुरंग दा निर्माण हा। इस हिस्से दे निरीक्षण दे मगरा रेलवे सुरक्षा कमिशनर होर इस बारे अपनी मुकदी रिपोर्ट जमा कराई देंगन ते मेद ऐ जे एह्दे बाद सिद्धे कश्मीर घाटी तोड़ी रेल सेवा शुरू करने बारे फैसले गी लेइयै कोई ऐलान कीता जाई सकदा ऐ। एह्दे कोला पैह्ले, जंदे शनिवारें रियासी थमां बनिहाल तगर इक होर कामयाब अजमैश कीती गई ही। परियोजना दे मुख्य प्रशासनिक अधिकारी संदीप गुप्ता हुंदे अलावा उत्तर रेलवे दे बी केई अधिकारी गड्डी च सुआर होइयै ट्रायल रन च शामिल होए।

<><><><><><>

ADGP Jammu Drug Menace

जम्मू दे अतिरिक्त पुलस महानिदेशक आनंद जैन होरें नशीले पदार्थ दी तस्करी पर रोक लाने सरबंधी जतनें दा जायजा लैने आस्तै कल इक बैठक सददी ते इस मौके उनें बक्ख—बक्ख एजेंसिएं बश्कार नेड़मे तालमेल, असरदार निगरान प्रणाली, खूफिया जानकारीयां बेल्ले सिर सांझी करने ते लोकें अंदर इस बारै च जागरूकता पैदा करने दे महत्त्व पर लोऽ पाई। उनें 2024 च नशीले पदार्थ खलाफ चलाए गेदे अभियान दरान जम्मू पुलस आसेआ हासल बड़डी उपलब्धिएं दा बी जिक्र कीता। सोशल मीडिया पर कीती गेदी इक पोस्ट च एडीजीपी होरें दस्सेआ जे पुलसै 200 कोला मते मामले दर्ज करदे होई 300 नशा तस्करें गी गिरफ्तार कीता ते केई सौ करोड़ रपे मुल्लै दी 43 किलो 850 ग्राम हेराईन जब्त कीती। उनें दस्सेआ जे इस कार्रवाई तैह्त पुलसै 19 बदनाम नशा तस्करें गी हिरासत च लैता ते नशे दे कारोबार कन्नै जुड़ी दिएं 15 संपत्तिएं गी जब्त करदे होई नशे दे कारोबार आहली 4 प्रमुख थाहरें गी नश्ट कीता ऐ। एडीजीपी होरें लोकें गी गुजारिश कीती ऐ जे

ओह नशे खलाफ लड़ाई दा उंदा सैहयोग करन ते इस सरबंघै च कोई बी जानकारी, हेल्पलाईन नम्बर 8100 पर सांझी करन।

<><><><><><>

CM Condolences

लेफ्टिनेंट गवर्नर मनोज सिन्हा होरें गरमैश आहले उपकरण करी दम घुटने कारण श्रीनगर दे पंडरेथन इलाके च इक्कै परोआर दे 5 जनें दी मौती पर दुख जताया ऐ। अपने सोगी स्नेह च एलजी होरें सोगी परोआर प्रति हमदर्दी जाहर कीती ऐ। तोआई मुखमंत्री ओमर अब्दुल्ला होरें बी इस घटना पर डूंहगा दुख जतांदे होई सोगी परोआर कन्नै हमदर्दी जताई ऐ। उनें लोकें गी गुजारिश कीती ऐ जे ओह स्यालें दी रूतै दरान गरमैश आहले उपकरणें दा इस्तेमाल करदे बेल्ले पूरी एहतियात बरतन। एलजी मनोज सिन्हा ते मुखमंत्री ओमर अब्दुल्ला होरें कल किशतवाड़ च होए दे दर्दनाक शिड़क हादसे पर बी डूंहगा दुख ते बसोस जताया ऐ।

<><><><><><>

Centre PMAY-G

ग्रामीण विकास मंत्रालय नै प्रधानमंत्री आवास योजना ग्रामीण दे तैहत किशतवाड़ जिले दे मुलवाड़वन ग्रां च अगग लगने दे हादसे करी प्रभावत परोआरें आस्तै विशेष हाउसिंग प्राजेक्ट मंजूर कीता ऐ। पिछले ब'रे 15 अक्तूबर गी इक बड़्हे अगग हादसे रु मुलवाड़वन ग्रां दे केई घर जबाह होई गे हे जेहदे कन्नै केई परोआर घर जनेई सुविधा कोला मरहूम होई गे हे। मुखमंत्री उमर अब्दुल्ला होरें इस हादसे दे दुए दिन गै मुलवाड़वन ग्रां दा दौरा कीता हा ते प्रभावत परोआरें गी केन्द्र थमां पुर्नवास ते मदद दा भरोसा कीता हा। अब्दुल्ला हुंदी केन्द्र गी मदाद दी अपील दे बाद गै विशेष हाउसिंग प्रोजेक्ट गी मंजूर कीता गेआ ऐ जेहदे कन्नै हुन प्रभावत परोआरें दे हालात फही इक बारी सामान्य होई सकगन।

<><><><><><>

LG CM Greetings

लेफ्टिनेंट गवर्नर मनोज सिन्हा होरें लोकें गी सिक्खें दे 10में गुरु, श्री गुरु गोबिंद सिंह जी हुंदे प्रकाश पर्व दे मौके पर मुबारकबाद दित्ती ऐ। सोशल मीडिया पर इक पोस्ट राहें एलजी होरें लोकें गी गुजारिश कीती ऐ जे ओह गुरु गोबिंद सिंह जी हुंदिएं नेकी आहली शिक्षाएं दा पालन करन ते समाज च एकता ते भाईचारे दिएं तंदें गी मजबूत बनान। तोआई मुखमंत्री ओमर अब्दुल्ला होरें बी सिक्ख समुदास गी इस पवित्तर ध्याड़े दिआं ममारखां दित्तिआं न। अपने बधाई संदेस च मुखमंत्री होरें गुरु गोबिंद सिंह जी हुंदे जीवन ते शिक्षाएं पर लोऽ पाई ते आखेआ जे गुरु गोबिंद सिंह जी होरें सदा गै लोकें गी सच्चाई, ईमानदारी ते वफादारी दा स्नेहा दित्ता।

<><><><><><>

Surya Ghar Udhampur (byte)

स्वच्छ ते किफायती उर्जा गी बढ़ावा देने दी इक महत्वपूर्ण गैह तैहत सरकार आसेआ रम्भी गेदी पीएम सूर्य घर मुफ्त बिजली योजना गी जम्मू संभाग दे उधमपुर जिले च बी लोक खरा मता पसंद करै करदे न। जिले दे लोक इस योजना लेई बड़ी मती दिलचस्पी दस्सदे होई अपने घरें च सूरज दी तपश कन्नै चलने आहले सौर उर्जा पैनल स्थापित करोआ करदे न। उधमपुर दे इक बसनीक कृष्ण गोपाल होरें इस योजना लेई सरकार दा धन्नवाद करदे होई एहदे सकारात्मक प्रभाऽ पर लोऽ पाई ऐ।

<><><><><><>

DC Kishtwar

किश्तवाड़ दे जिला विकास कमिशनर राजेश कुमार शवन होरें मुकामी लोकें गी सरकार दिए बक्ख—बक्ख योजनाएं जि'आं युवा मिशन, पीएम सूर्य घर मुफ्त बिजली योजना ते कौशल विकास प्रोग्राम बारै जागरूक बनाने लेई पाड्डर किश्तवाड़ च इक जागरूकता कैप दा आयोजन कीता। इस मौके पर उनें नौजवानें दा दिल बघाया जे ओह मिशन यूथ कन्नै जुड़न ते कन्नै उत्थुं दे मुकामी उत्पादें जि'आं पाड्डर दे काले जीरे, मुट्टे अनाज ते जैविक खेती गी बढ़ावा बी दित्ता। इस मौके पर केई सारे मैहकमे अपने स्टॉल लाए दे हे जिंदे राहें उनें मुकामी लोकें दिए बक्ख—बक्ख समस्याएं दा नबेड़ा करोआया। डिप्टी कमिशनर होरें इस मौके पर बच्चें दी दिक्खभाल आहलियां किट्टां, राई—बाई सरबंधी उपकरण ते दिव्यांग लोकें दी मदाद आहला समेयान बी बंडेया।

<><><><><><>

Highway

काजीगुंड सैक्टर च भारी बर्फबारी दे चलदे जम्मू—श्रीनगर राश्ट्री जरनैली सिड़कै पर गडिडएं दी आओजाई दौने बक्खी दा बंद होई गई ऐ। प्रशासन नै लोकें गी सलाह दित्ती ऐ जे ओह मौसम च सुधार होने ते सिड़कै दे बक्ख—बक्ख हिस्सें थमां बर्फ हटाई लैते जाने तगर जम्मू—श्रीनगर राश्ट्री जरनैली सिड़कै पर जात्तरा नेई करन। तोआई ऐतिहासिक मुगल रोड ते सिन्थन सिड़क बी गडिडएं दी आओजाई लेई बंद न। ताजा बर्फबारी करी कश्मीर घाटी च सीत होर बधी गेआ ऐ जिस करी आम जन—जीवन पर माड़ा असर पवा'रदा ऐ। मौसम विभाग नै आखेआ ऐ जे पच्छमी ब्हाएं च खौदल च करी जम्मू—कश्मीर दे उच्चे पहाड़ी इलाकें च अज्ज दपैहरी तोहड़ी हौली शा दरम्याने दर्जे दी बर्फबारी होई सकदी ऐ। ऊआं दपैहरी दे बाद मौसम च सुधार दी भविक्खवाणी कीती गई ऐ।

<><><><><><>